

Kempen cegah orang ramai beri makan kepada kera ketam dilancar

SATU kempen untuk mencegah orang ramai daripada memberi makan kepada kera ketam (*macaque*) telah dilancarkan semalam.

Ini meskipun bilangan orang yang memberi makan kepada monyet telah jatuh daripada lebih 100 orang pada 2016 kepada kurang 30 pada 2019 sejauh ini.

Kempen selama tiga tahun itu dilancarkan semalam oleh Institut Singapura Jane Goodall (JGIS) dan Kumpulan Kerja Kera Ketam, sebuah kumpulan sukarela, lapor *The Straits Times*.

Pelbagai daya usaha akan diadakan di bawah kempen itu termasuk acara berjalan di kawasan semula jadi, ceramah awam, wawancara dengan penduduk di kawasan yang mempunyai banyak kera ketam dan mengajar orang ramai tentang cara selamat mengawal kera.

Cara itu melibatkan kefahaman tentang kelakuan monyet, dan membawa mereka keluar dari kawasan perumahan secara tidak agresif sambil memegang tongkat atau payung.

Tempat-tempat yang mempunyai banyak kera tersebut termasuk kawasan perumahan di sekitar MacRitchie, Bukit Timah dan Upper Thomson yang berdekatan dengan hutan.

Kempen baru itu diumumkan oleh Menteri Pembangunan Sosial dan Keluarga, Encik Desmond Lee, di *Persidangan Kewujudan Bersama Hidupan Liar-Manusia di Asia: Konflik dan Mitigasi 2019* di Pusat Ekspos dan Konvensyen Marina Bay Sands.

"Disokong data dan maklum balas, kegiatan pendekatan dan pendidikan akan ditingkatkan, dan usaha mengawal monyet akan dilaksanakan di lebih banyak kawasan.



"Butiran lebih lanjut akan dikongsi dalam beberapa bulan akan datang, sedang pelan itu terus berkembang, dan dilaksanakan," kata Encik Lee.

Encik Lee turut mengumumkan satu kajian selama tiga tahun yang melihat tingkah laku, pergerakan, diet dan kesihatan kera berekor panjang itu, yang akan dijalankan oleh Lembaga Taman Negara (NParks) dan Universiti Nasional Singapura. Kajian itu akan bermula pada Januari 2020.

Dalam ucapannya, Encik Lee menggariskan daya usaha Singapura untuk melindungi hidupan liar sedang negara ini membangun.

Ini termasuk menerapkan kehijauan dalam perancangan jangka panjang, rancangan untuk memulihkan hutan sekunder dan mengembangkan usaha pemulihian spesies, serta peralihan kepada penyelesaian berdasarkan alam untuk menangani kenaikan paras laut dan suhu.

PERSIDANGAN HIDUPAN LIAR:
Menteri Pembangunan Sosial dan Keluarga, Encik Desmond Lee, berucap di Persidangan Kewujudan Bersama Hidupan Liar-Manusia di Asia: Konflik dan Mitigasi 2019 di Pusat Ekspos dan Konvensyen Marina Bay Sands semalam.
– Foto BH oleh CHONG JUN LIANG